

弱

水

集

序

有千古不一之世而有千古不一之人人與
時之相錯而其所表見亦異尚論者特憑其
所自表見則大抵不外乎文章而遠言微
感而遂通天下之思尤莫詩若也夫詩源性
命而為流故聖人之教以先禮樂列於六經
通乎政治樵夫牧豎可以同其興而蘇李莫
能究其歸顧世多易言之余自壯角慷慨興

思一往而不知所屆恒自託於咏歌而不善
其辭之達遇當時之以詩名聞者輒傾倒焉
既歷其塗以閱其夷險窮詰屈披蒙翳蹶而
起迷而復者不知其幾而向之所傾倒不覺
悉去諸懷而冀幸心之一愜不可得矣夫辭
不虛立意不徒行意不逮辭則嫫姆艷飾辭
不逮意則西子裸裎彼鸚鵡人言沐猴冠裳
詎足以神應對而時趨蹌也哉世有野鳥而

鳳鳴者人見以為鳳也則固未嘗見鳳而聆其聲耳未嘗見鳳而聆其聲則野鳥可鳳鳳可野鳥又孰為之辨其微乎戊戌之秋余再至京師或為余誦悔翁之詩亟訪之索讀其全稿而心無不愜迄今二十餘載而無所復移固知論詩於漢魏三唐以來不能捨是而有所取則矣觀其鎔鑄若李杜猶少有憾焉而世尤易視之悔翁楚系而家秦年二十五

東遊流寓於邾子之國歷齊魯吳越燕趙之
郊數十年孤貧且老更滯跡薊門但有集若
千卷充於行笥東阻海涯西望渭水關山夕
陽憑弔何極而寂寞身後誰為歎歎而太息
然非交遊之寡而知之者尠蓋自卿大夫以
至閭巷之士亦皆稍知有悔翁而悔翁則固
已如此易之者之知之同乎其所謂知耳擣
菹一擲百萬冶遊一揮千金與窮愁著書冰

凝竈突者雖比屋不相為問源之所流者遠
性情與習尚之踈也然吾見有以單詞片語
見稱當世而焜耀一時者抑又何歟締綌不
可以冬陳而黑貂之裘以夏市又何咎乎然
則悔翁之有是集而欲梓之而傳之也不其
難哉辛酉秋忽有其同里茂才賀閭然克章
者館於萬全縣幕見其詩歎曰是集而或不
傳俾別有所待吾鄉其無人矣亟謀付剞劂

聞之者異之亦相與助其成焉於戲是集而
果傳也吾不知千百年後之讀其詩者果能
會其辭通其意以辨其微焉否乎然必有掩
卷太息以想見其人而歎歔曰是隆中之未
遇乎是黃石之長往乎胡為乎卒不達于當
時而終若此乎使其不然而為波濤于滄海
為風雲于寥廓何遺恨乎今茲若然悔翁亦
可以無恨矣悔翁固嘗一舉鴻詞而未之應

也夫豈可以窮愁為身世問亦惟想見其後
之人之有然以與之終古使悔翁而非窮愁
又安所得此於後人悔翁亦可以無恨矣
乾隆壬戌元夕長洲學弟馬璞序

弱水詩藁目錄

卷一 五言古詩一百一十首

卷二 五言古詩八十三首

卷三 五言古詩一百一十三首

卷四 七言古詩三十八首

卷五 七言古詩五十五首

卷六 五言律詩一百五十八首

卷七 五言律詩一百四十二首

卷八 五言律詩一百二十六首

卷九 七言律詩一百七十六首

卷十 七言律詩一百二十四首

卷十一 五言排律八十一首

卷十二 七言排律二十六首

卷十三 五言絕句一百七十一首

卷十四 七言絕句一百八十三首

卷十五 咏物詩六十九首

三言古一首 五言古十九首
七言古四十九首

卷十六 咏物五言律詩五十九首

卷十七 咏物七言律詩一百四十六首

卷十八 咏物七言律詩九十二首

卷十九 咏物五言絕句十八首七言絕句三十三首

卷二十一 一字題詩一百首

卷二十一 樂府體咏古詩七十八首

卷二十二 樂府郊廟家祀五祀歌謠銘贊共六十二首

共計詩二千二百一十七首

弱水集卷一 五言古

蒲城屈 復悔翁著

曾孫 來泰志同錄

長洲馬 堞授疇

同邑王 垣紫亭

武陵陳長鎮宗五

評 受業

山陰章文禮節文

校

登堯山 七首

項橐哲人師甘羅使客星曰予一何爲愧彼二子齡堯
山三十里蹉跎猶未登晨興忽嚴駕荒蹊芳草生鳥弄
邨塢風山花表野塍懷新無愁鞍疾驅翠雲屏始至遂
忘疲若獲古人情佳氣開平原流烟嫋嫋青
朝嵐染晴霞射日化烟霧霏微溼我衣浪擁西南去鳴

咽八水聲來入重泉樹適聆長者言下有漢唐墓

羣鴈翔且鳴飛過東北嶺靜言瞻所向回頭見圓景杲
杲無端倪遙灼茲山頂谷風與之俱吹我春服冷童僕
苟勤煦獨息陰崖影深林有恬翼間關坐相竝若挂寒
泉流可以臨箕穎

泉細甚

隨山成獨往適與初心愜回環無計程亭午猶未歇樵
子在何處樵歌響林樾喧寂各有天交耳亦可悅沉吟
從中來愁因清境發幾樹野棠花今日清明節

游蜂飲花香逐春不知遠樵牧半就途復茲行緩緩綠
雲翠已深憇石風欲晚山光學水流歸鳥知林善淡陰

交空碧紆迴興不淺衆妍赴夕陽餘輝千萬變

反照明嶽蓮削成現微碧露生衆草青氣凝六合白想
當成周時豐鎬帝王宅吾邑昔赤縣茲山有登歷奈何
千載下名不垂竹帛鳥獸趨林鳴烟嵐黯無色遠望揖
三峯惠之以松柏

山月送人歸山情若欲留何以蒼山情西向崑崙遊五
城有琪樹花香十二樓實成無人採殊爲天下羞我欲
登其顛憑欄望九州非爲餌靈藥庶將澄濁流袖來瑤
池核歸種此山邱春花吐紅雨結茅花下頭永爲青岑
客香風吹不休

漫泉

受性愛流水城西有清泉寂寂原埜塵靄靄蒹葭烟

灌葦

田數十頃

入渭通舟楫滋花近長安潌洄副留玩每至不欲

還宛在懷伊人一邑此潺湲有時飛爲雨清風吹遠天
良遊難屢得晝夜何涓涓

溫塘

在邑東四十里

青山旣靄靄烟樹亦蒼蒼雪滿金粟堆融融流水長浴
沂仰遺躅童冠偶相將本不願承蹕幸不近咸陽但期
泳鳧鷖安能游鳳凰粳稻夏彌綠桃李春自芳聊以全
吾潔天寒野花香

私懷 八首并序

予八齡屬辭邑歲進士王公誥謬許姻好桃花
春風兩小無嫌辛酉秋親迎有期而病逝嗚呼
予三歲喪母又鮮兄弟今十四矣君臣朋友之
遇合他日未可知惟此而已上有白頭父將合
而離殊傷親心詩若干首
題曰私懷明未成禮也

朝望秋夕來暮望秋風作秋風一夕生銀漢千里濶空
谷蕙蘭花未開忽已落斷石留閒園古槐蔭阿閣淚迴
向心流揖對晨暄客每隨林下碁遂接堂上酌漏聲涼
漸永殘燈耿虛幕念我白髮親慘愴然疑作

白榆一何繁河漢界其間引領出空齋纖月下檐端心
摧意不續只言秋未闌汝勿怨殘缺三五露溥溥人生

良所甘風竹起長歎少小多憂思韶華永棄捐

憂來驅我去何處滌煩襟清晨古寺遊落葉自荒深
颺動寂寞稍稍生重陰私懷如萬籟有聲無不沉去去
歸吾廬夕陽結寒音

長恨春風遠不如秋風近秋風今萬里秋雨復隱隱君
看搖落處野花香難盡

秋日照檐隙入我讀書窗青編滿四屋如聞苦菜香吳
綾貌孤鸞又畫爲鴛鴦鴛鴦自有匹孤鸞本自雙

落葉搖寒烟西風動殘日殞宮在城南駕言乘夕出荒
徑殊音集宿草應涕溼將合而乖離無乃太倉卒

名花幾千枝鴛鴦三十六汾陽破陣歸半生香裏宿
夫貴特達所志在鴻鵠芙蓉未出篋陰符猶閉籥上有
白髮親神傷諒莫贖萬里激清風長嘯振空谷悠悠坐
山雲漫漫天西玉我思非所存露溥滿庭菊

秋菊開東籬芙蓉開池上皆言色與香脉脉心相向白
露溥溥飛青霜烈烈降誰令兩地花生死同相望

金粟堆

五峰翠欲流秋氣何蕭森中嶺疲已悔及顛生隱心下
有明皇墓荆棘荒且深感彼削平事中原竟陸沉雨吞
逕歎危鵠鵲啼晝陰烈士多少年洛水吾知音

郊行

芳春惜春陰城東宛如昨風交麥浪浮雨霽楊花落邨
犬吠儒衣夕鳥噪林薄永閒江海心天台採靈藥

興時鎮

在邑城西
二十里

烟火密萬家業楮以爲命皎潔雪霜明滑膩脂韋竝投
宿亦偶然月落雞犬靜各里盡憂虞茲里獨歡慶賈客
通貨泉先王有善政道期海宇同聲無鄉曲應開門雪
作花迴風塵生甑却惜城中人冒寒走朝逕

吾縣共五
十四里里

有長猶
社也

夜歸

飛星淡輕瀾遠浪明積雪幽逕澄歸心况見漫泉月觀
生卽浮雲出岫逢秋節路夕馬蹄疾霜寒蛩響咽清流
交浦烟衆響散林樾入門光未斜曉鐘坐來歇

送佩玉

拔我青萍劍斷此別離情悲歌亦瑣細慷慨送君行同
此少年日樽酒贈平生感時多風雨轉盼暮雲橫屏營
忽不見何處馬嘶聲

過姪孫守謙村塾不值門外聞生徒讀書聲立久
之乃去

蒹葭影交風漫泉流如矢孤村半夕陽人遐室何邇林

紅葉如花雲白山似水一鈎新月涼天在書聲裏

偶過北寺 四首

古槐響寒音斜陽淡朱戶金碧落莓苔樓閣寂空宇城
中幾招提茲寺傳最古既見俗淳深亦占邑寒苦風葉
上人衣齋堂竄蒼鼠西北半開園八齡讀書處

幽禽驚客心啾啾繞樹飛遵垣拂舊跡呼童啓荆扉汝
昔未巢時我先此下幃我年未弱冠人事每多違廢興
一悵望喧寂相因依

小逕秋草綠荒塢夕陽遲精舍半不存存者網蛛絲感
慨同研人雨散有餘悲月季亂著花空柳卧生枝沙磔

居人後猶是暮歸時

出門還入門古屋未傾墜返照明窗隙雪案留吟地遺
墨猶在壁師語足垂淚風前蝴蝶飛花下羣兒戲寬彼
獨嚴予此事今猶記二十不飛鳴三十難豫計新月挂
高城離離滿空翠嗚呼不能忘一言與北寺

知己之感

春夜讀書鄰人有歌南曲者

鴈唳帶星流鐘聲寂城闕暮烟桃李香清齋孤興發汎
覽穰苴篇魯論自怡悅盃酒聊獨進看劒擊玉玦快誦
太史書輟耕秦已滅窗影人坐花清歌風度月突兀天
府空壯懷轉消歇秋泉自然響長笛其幽咽獨立湘簾

前洋洋飛白雪

就醫整屋縣曉發

慈烏出深樹欲出還復留人生有行邁高堂已白頭
磽確南山道波瀾渭水舟在家尚眼申出門抱離愁
大鵬萬里飛男兒萬里侯長安向西去二曲寧遠遊
含笑囑早還黯然淚暗流藥餌如有靈臘月歸故邱
藥餌如無靈不歸更何求數聲征馬嘶初日照高樓
無事而別離實爲人子尤

謁李子德大史

翊冠江海心寤寐天下士會合固有時咫尺聞三李

曲二

雪木子德時今日登斯堂山島竦而峙長揖辭木天捧

謂關中三李書轉色喜座上多衆賓移予近杖履天風吹琪花紛紛

落雙耳孝章雖忘年上感通家子大史自言與先伯盟兄弟投轄望

苦深昏夕坐不起霧豹兼雲鵬出處各有以愧無適俗

韻行將切仰止時西謁二李

長安

古來利名地依然利名塵朱纓竦輕轡三市鳴車輪秋
風白蕭瑟渭水自淵淪四顧無相識百年傷我神漢高
有遺廟松柏摧爲薪步出城西門茫茫誰問津

盤屋道中

在家苦愁思出門苦病軀二曲山水鄉適與素懷俱修
坂陟尋雲流潦紆我途畏墮獨木梁田塍正沮洳同心
有三子劉伯容仲昭昆仲家佩玉姪孫野情轉于于牧人荒草犢遺粒
空田鳥不愧瘦骨寒庶非名利驅

過貞賢里

嵐翠覆華宇門對終南山槐柳寒無葉亭亭出簷端中
有學道人辭榮卧邱園著錄名反身旌里名貞賢風揭
渭水冰雪迷玉女泉扶病風雪途行旅良險艱室還人
不還三過鄉閭前

二曲李先生韻辭詔講學門弟子三千人所著有反
身錄當事表其閭曰貞賢里歲丙寅予年十九冰雪

中扶病晉謁尼止者一邑同聲予姪孫佩玉友人劉伯容先登龍門又退有後言竟廢然而返德修謗興古亦有之且東家某可念亦未有甚至此者後欲再訪而先生謝世是非真僞蓋棺論定年少鹵莽存此識悔後有郢縣王澧川心敬亦辭詔卽二曲門人也

郢縣道中同佩玉

湍湍溪水活洋洋紅日高百花香未發和氣適遊遨轉盼生風雲連山湧波濤四體暗起粟飛霰集征袍豈無陽春時尋芳採蘭臯但恨行役晚天地閑一朝人生有何常冷暖隨所遭心感平淮蔡路近左伯桃且當放情志嚴寒何憚勞

送從姪敬止攜家之襄陽

七首

春風吹楊花漫天作雪飛送君向襄陽願君平安歸啼
鳥猶命侶芳草綠路衢宗族未能濟自顧非男兒今日
行城東明日行天隅初意今不從相勸立斯須

三秦五載飢富者日以貧貧者半溝壑生者鬻兒孫吾
家祚衰薄十代爲清門富貴忽已過舊業少田園一冬
無雨雪旱魃又三春遠遊亦良策但恐行路難

路難良可慮八口越山川習池在何處千里正漫漫汝
水嗚咽流豫雉界其間男兒苦跋涉婦子多險艱此行
當四月雷電疾雲烟晴日猶困頓淒淒風雨天

風雨天難測米賤人所慕近聞半秦民盡下鄧汝去一

邑十萬家忽增十萬戶官有富弼賢米價能如故故鄉
空憂虞他鄉誰相顧清流爨不鳴積雪冬無路斗米卽
百錢百錢來何處

鴈北而人南胡不作一行原野何蕭條攜手上高岡飛
自在腕下年命若朝霜日暮有行役付我理歸裝我方
二十餘君已六十強相見未有期後事豫難量

更進一樽酒飲君願勿餘大兒工制藝次兒富竒書丈
夫志四海豈必老一隅風雲生指顧何路非亨衢孤雲
尚羣遊走獸遙相呼古來裴行簡不知今有無

有無安可留留亦兩相誤紅日初出時函關起烟霧欲

言無二三斜陽忽已暮襄水無停留行人有時住目瞻
仙掌雲月明峴山樹原野動悲風東西鳴狐兔一身獨
歸來全家向南去

古詩二十二首

開我芙蓉鏡挂在明月枝五岳忽飛來端坐胸之陲我
家遷關中今已千載餘今夕一相照心緒不能辭役役
車馬音蕭蕭風雨時廢賞而逐跡何以接馳暉

聖人不嘗藥疾疢何由生聖人不造書此時猶結繩聖
人不征伐中原無戰爭二十一少年空懷今古情

何處少梅花豈心霸陵雪徒令輕薄兒嘵嘵多口舌驢

背饑且寒古芳向來歇神倦意苦深流水自鳴咽寒香
何足貴性情本吳越

團團一株松纍纍幾片石淺刷得茯苓深刷得琥珀同
根而殊情他人復何益

四運多變易幽人守寂默草木如欲言嬌鳥鳴不息飲
博無賢愚酒肆有樂國歡呼在一時千秋非所惜枯魚
遊釜中有水豈安宅

去年終南花移向長安城綠葉發奇香五彩含殊榮至
今臺榭前百種無一成姓字老雲霞在山本無名道傍
馬蘭花日逐車輪行

靈芝種不成惡草何蔥翠我從商南來慣識仙山氣穢
邪慙俗流未悟身如寄風霜有殊威雨露恩何易經年
守寂寥澗底見叢桂嗟爾蓬蒿才誰能測天地

結交莫恩多恩多怨易深種樹莫種少種少不成陰東
家茅如山西家蒿百尋際會非偶然難爲來者心

西來咸陽道東到函谷關北臨黃河水南望大華山山
河一百二春色滿長安精神真不寓佳務非所歡異者
心未羣况復希衣冠韶華無留景正月生嚴寒歸來洗
孤清俯仰天地間

冰雪娛青春閒情種蘭蕙呼龍耕白雲遣鶴鋤嵐翠不

測涼露心何求美人佩山川廣且遠過者成睚眦
種蘭人所忌何不種荆棘荆棘已多門過者皆辟易大
道直如弦日月黑如漆我亦有羅裳安保不我刺
少年寡端居西上長安道朝渡渭水河暮登長陵眺清
露易下來繁星出何早虎不避豪賢雀飛形蚴蟻駿馬
駝黃金誰與爲歡好

我欲出函谷直至東海湄一笑擲千金古道成荒谿春
風從東來吹我單裳衣莫聽雲間鴈聽此籬下雞雞鳴
報晨夕鴈向何處飛

白鵬修形容振羽濯清流黃鵠奮其翅大鵬萬里遊所

以老莊輩於物無所求目前清冷淵雙鯉吞金鈎古來
尚子平達而未能周不知死者樂不見生者憂

吾鄉多猛士技擊無鷹鷂衆中叱荆卿勇在要離先一
言讐百刃風雷勢崩天江東八千人誰能差比肩黍稷
委場圃日月靜山川一虎當路衢萬夫皆迤邐幸未隸
征伐不覩心膽寒儒生不爲家窮巷淪青氍區區謝少
年意氣樽酒前

切切秋香枝欣欣桃杏時朝爲若耶女暮作吳宮妃如
花三千人皆被羅裳衣酒肉如邱山歌舞送春暉黃巾
百萬衆長安輕薄兒昨日洛陽宮化爲荆棘谿湯鼎無

酸醎春蠶無杼機越客千絲網今日結何爲

西北有貧女日日憑繡牀纖手壓金線迴針刺鳳皇羽
翼分五色精彩四飛揚虞廷昔來儀岐山鳴朝陽淮陰
惡少年何意欲傾箱媒妁朝成行白璧暮成雙含笑而
長嘯空庭蘭蕙香

女兒不嫁時日日自言巧一夕登華輿鼓吹喧長道觀
者填路衢皆言新人好三月秉機杼三日入厨竈家中
諸兒女無衣腹難飽北風吹雨雪鞭扑復誰告珠玉媚
翁姑睢盱抗兄嫂牝雞啼向雲惡聲驚百鳥不記深閨
時飢寒泣昏曉

出我城西門漫泉泉上步時見綠楊鶯啼入高枝去清
溪獨往人桃花夢中路

城市有吾廬樹下一虛室夜雨不能寐惟聽鼠唧唧跳
擲拂瑟瑟作索情未畢嗟我架上書四壁無長物淅瀝
簷溜聲秋風資窸窣義農去未遙仲尼懸日月尚際秦
皇焚何足挂齒舌我亦一少年愧乏張湯律

探梅霸橋邊川渚一樹無來不及春陽雪霜又何愁在
昔王景畧捫虱此橋頭江東尚可存魚水空悠悠斯人
良已矣渭水東西流

出空匹練白九月甲子歲橫貫井鬼中直抵角亢次飄

飄隨光心鬱鬱諸賁氣一身際良時默然驗通會

具漢魏風格參以六朝俊雅又
出已意不落陳陳相因套語

別草堂

抱我龕中主載我架上書右手提長劍左手攜金徽平
生生長地此去恐長辭中門一回首竝立空斯須昔時
植花竹左右多根株黃鵠歸飛雲鵲鵲寄一枝物性咸
有托嗟我獨無依

別姊

荒雞鳴曉霜霜落風動時厨中新炊熟戶外班馬嘶須
臾發日光慘淡如舒絲堂前跪吞聲自今與姊辭姊归

汝行決苦留亦奚爲汝家有病婦汝身無連枝哽咽聲
不續抱頭但一哭

別病婦

行李發堂前還與病婦語病婦起踉蹌牽衣淚如雨萬
里一身孤誰與郎交素貧病妾所甘莫向天涯去妾病
垂十年那能保朝暮郎作封侯歸妾作青陵墓郎待妾
骨寒從郎去與住男兒有肺肝何能老牖下叶死當長
相思生當不相負一聲長歎息揮手不復顧

別隣人

隣人知我去提壺踵相接長揖臨前除酌酒復咄咄皆

云積德門零落不及月少者方歎息老者已哽咽盡此
孟中綠聊以壯行色自古有困厄努力企前哲長笑出
柴門慷慨成遠別

別先君墓

黃河下崑崙有時成涸轍金人鑄咸陽有時亦銷歇惟
有父子恩生死無斷絕行役拜先墳嗚呼淚如血

家庭詩最難在全具至
性非依傍者能道隻字

有懷

十五月團團十六團團月十七送君行蟾兔忽已缺二
十攬餘輝清空不可掇沉思放情志石橋度秋節淅淅

回溪風蕭蕭轉林葉道來竟不來光與水幽咽

友人招飲

麟鳳人所羨各有性與情飛馳亦分定性情隨所營五
月南風來有酒香復清此酒飲三度浮雲百變更麟化
趾與角鳳化苞與翎麟鳳既善化觸處來青蠅青蠅何
爲者羣作薨薨聲赤日不沸湯東海不凝冰富貴苟可
求聖哲當分明五月南風來有酒香復清此酒飲三度
浮雲百變更此酒聊相持浮雲安足矜

南澗中作

在鄆城
馬陵山

南嶺與北嶺斬然分一岸青溪從東來蕩漾成深澗澗

深溪增波澗高山嵯峨溪盡山不盡隔嶺聽樵歌歌聲
落明霞散作澗上花採之不盈掬旋被白雲遮雲寒飛
不起半在龍潭裏涼風細細吹石上弄秋水水清見魚
遊無人解垂釣遂令空谷蘭香隨秋水流水流石崩摧
萬壑聲如雷驚起林中鳥飛去又飛回飛回向何處還
向青松樹我欲度松林露華滴前路

友人雨中過寓齋

夙齡爲時棄蓬根欲飄蕩道孤志彌敦君心獨相向衝
泥清且閒脫畧紛埃障斂翼見奇懷卑棲善疎放久雨
聲細微虛懷發高唱匝月邁陰霖涇渭增暗漲浩浩長

安遊予懷當益壯風息簷溜鳴雅意夕方暢

南樓雨望簡友

南樓無晝夜市喧山常靜啟窗臨西東豁達展靈境邁
茲淫雨時安識山河影君住高樓下我住高樓頂自倚
身居高形勝目易騁風鬱夕烟深水騰朝霧迴城郭尚
參差變幻在俄頃簾垂簷溜明虛疑開斜景齊物理未
叅乃知難獨逞瞻矚且復然萬慮醉初醒

經黑石渡

李郭同舟處

落花下雲根參差古烟響神仙冷壯遊經過成幽賞曉
已分岸碧白雲當空漾遙遙幾陵岑乃聞遭釣黨春露

散紅霞空山愁浩蕩氣概落天空精神青苔上志士每
懷悲達哉慨以慷

無端

春染流雲綠芳烟橫高樓蕭蕭征馬鳴浩浩佩吳鉤紅
塵蔽天地江湖萬里遊驛路逢歸人流離在嵩邱饑寒
尚無濟乃言千歲憂野田花亂開晚風冷於秋無端此
一身白日過人頭

史稱謝朓工於
發端梅翁有焉

寒食

百花濡紅露羈魂愁未足芳草暗郊原城下語心曲咽
咽厨中聲平明麥飯熟病婦掃新塋荆榛向人轟古樹

留夕陽燕歸誰之屋風霄柳絮飛荒墟漫新綠未知生
者榮但知死者辱死者長已矣額爲生者願

宿白馬寺

在洛陽城東二十里

樓鳥上松花送客洛陽道招提景中人一夕紅顏老微
雨過蘭臺石室森如掃二十七年心長風散春草

辭葛篇

新安寄葛辭賦

六月長安客披裘上東門當晝鳥不飛炎天灼蘭蓀感
君傾蓋惠一葛哀王孫著來非不清所悲在寒暄霜雪
斷饑骨凍餒切煩冤珍重連城璧舉手謝高軒嗟我舊
衣裘零落不復存安得死道路庶反平生魂

六月六日作

蒲邑是日祭
掃如清明節

盛夏野草長遊子思故鄉
春雨寒食後風俗繼蒸嘗
孤身復行役戚戚增悲傷
傷哉三尺土寂寞古道傍
道傍白孤立號風吹野棠
西隣栽松柏東隣刻虎羊
所愧爲人子天地空昂藏
承歡無菽水祭掃無酒漿
生死兩未逮飄零天一方

日暮吞聲哭獨步陟北邙
北邙多古塚蓬蓬蔓草荒
殘碑橫無字誰酌酒一觴
狐狸眠土窟童子牧牛羊
暑氣生愁色感我苦哀傷
有婦昔卧病未知存與亡
有姊已從夫門戶非所當
百年如轉燭冉冉凌飛光
破產不爲

家古人安可望死者間幽明生者隔參商生死惟一身
念之摧肝腸

立秋日

六月空中白隱隱火欲流迅雷驚石破雨報關西秋新
塋生多悲夜哭空山邱念子銅駝陌孤蓬背鄉國誰能
嗔天公葛裘交相責霜露饒疾藜中有遊子跡行將生
遠愁漫漫在今夕

非空非色卽空卽色
深入無諍三昧

哭從姪敬止

甲戌十二月姪孫琚自蒲至洛云乃父於五月
日捐館鹿邑時猶以不予見爲恨相持痛哭魂
魄摧動東望哭之以詩鳴
呼死者有知尚余鑒衷

日日望子歸萬不料子死一哀洛水昏嗚呼我負子六十非短齡家遠二千里回首函谷關想見漫泉水雖云老病軀大半懷桑梓辛未三月初攜家向南徙送出城東門囑我營歸計露涵芳草濃青霄低烟藥不知是死別尙作生人唯日月共照臨至今猶在耳書報襄陽居人傳鹿邑止朝聞行路難暮聞客况美傳聞多參差一驚還一喜我方欲東來大故忽臨邛微軀沉層水萬事皆敝屣今春破產東洛陽乏行李誓將窮扶桑豈徒歌豐芭及作懷子詩夢子荆棘底不爲惡夢徵果兆摧蘭芷淚湧漚澗渾雲斷悲風起古寺迷荒月三川結飛晷

廿載締深交慷慨各自矢余年較仲孫余少將半紀子
年昔較余幾幾長倍蓰分則叔姪然情則兄弟爾祖孫
叔姪間忘分兼忘齒傷哉捐館時呼我猶不已歲寒諒
不渝橘柚化爲枳往事宛如昨獨抱一諾恥豈無兄弟
親而必疎可恃豈無宗族長而必少可倚全家半間關
病婦哀欲毀愛女天一涯弱孫纔及几子壯名未成遺
恨黃泉裏稜稜北邙雪杳杳梁園市洩雲雪寒空孤鳥
下川汜舉聲遠招魂東望不成誅願魂返故鄉祖孫同
杖履碑板劈窠書尚其圖劓靈柩在鹿城尚其圖終
始北風吹落葉颼颼打窗紙燈焰閃殘光陰陰暗牀第

心赤跡如墨嗚呼我負子

古南池

浩蕩湖海遊慷慨每懷古任城得南池少陵昔遊處參
差紅藕花亭前落香雨當其客秦州艱難絕雞黍森木
清風來鳴蟬飮朝露市喧一以寂長吟倚亭柱城上太
白樓遙對烟中語

遊古歷亭

漾舟契秋色佳遊仰昔賢平湖帶高城孤亭方悄然遠
香浮水際李杜播瑤篇日華麗清淺雲影媚淪漣古人
下真士跡逐精爽傳餘輝耿未歛澄波淡重淵一馬竟

罹厄長虹忽亘天至今飛鳥過啼血如杜鵑空中駐阜
蓋回首鬱蒼烟西風蘆荻暮夕露泣衰蓮文舉旣寂寞
元禮亦迤邐斯人復逝矣月明獨扣舷

傾蓋亭

神交無今古我來傾蓋亭下有衰草色上有暮雲橫一
時偶相值遂成千載名感彼滄桑事天地無隱情夷蹠
雖白首終當隔平生冷風動遠樹寒烟落高冥九原如
可作黃鳥向人鳴

田園雜興十九首

山水幽以潔沙田瘠可耕所獲諒儉嗇與沃壤青油

油思膏澤欣欣春雨生
瘠者有時厚沃者或不競
土脈既流轉天道善虧盈
努力奮且鋤收茲一日成

禾黍日已長新穀行當有
還視廩中儲尙餘二三斗
家貧無釀具聊以粟沽酒
悠然成獨酌南山當戶牖
燕子營巢飛啣泥落吾手
得失亦偶然胡爲緘其口

日出無賢愚勞生天地德
野鳥去深林檐雀亦求食
看桑葉青匆匆杏花白
婦子蠶幾堰丈夫事耒耜
百藝徇一身各用竭吾力

褊性與麋鹿常恐山不深
歸雲無留跡風去有遺音
情至興自適古者沮溺心

秋澇水沒穀春乾野無草耕種當乘時我犢腹不飽筋
力難猝實驅使易傾倒舉家中粟減之飯昏曉鳩鳴
高樹枝蟻封場邊道君看早晚間只恐風雨好

雨餘雲歇山風和鳥啼樹恬淡日邊光微茫花上露獨
居無所營荷鋤南畝去瀑水流新聲濺珠散成澍含意
念真源隨遇偶然住

處樂不敢極苦貧何所戚屢空昔有人浩然媚佳日籬
落烟火生正隴麥秀實野老向我言牛羊皆好育惆悵
渺予懷隔嶺山烟碧

杏花開到門桃李復爛熳欣欣齊向榮風水香平善開

懷墟落游歸時脫粟飯入山未爲深離居亦云遠佳興
各有本觸處情自展

種豆不生種麥麥不熟幸餘分寸田黽勉種晚穀雨
多耘日踈苗稀草易簇萬事皆等閒安敢慍僮僕今朝
風日晴展書還復讀饑飽隨定分和平以養福

野塘雨後水東西南北流田夫紛浣浴鵝鴨或沉浮觀
其任化遷聲意安可求吾亦濯吾足南風吹不休

租稅行將畢社錢尙多虞年稔豐一飽日在東南隅來
者諒如此負暄聊自怡

日午禾欲焦鋤禾心體勞不惜心體勞天雲陰復消揮

汗可成雨安能潤枯苗一鋤償一粒其數多于毛迢迢
餉饁婦隴上藉蓬蒿夫食婦相代相勸看詰朝

土溼熱益煩鬱鬱蒸我田旣耘風又來溫溫蒸我肩豈
不惜工作及時念飢寒良苗乘餘潤開茲隴畝顏抽新
感嘉穗勤苦力所歡荆榛亦儲薪茂豫亘陌阡日暮禾
下宿微涼生懷端

束穀朝登場新炊晚餐賸飽忘力作勞時得趨走性蟬
鳴高樹顛人依高樹靜四海方宴然收穫旦夕竟置酒
會里閭願保永歡慶

少壯如秋風念之懷蕭瑟殘年從所務東邨事稼穡適

當收穫期場圃各有積祝雞禾穗傍飯牛柴戶側農工
非一端婦子更相直樵牧多遠謳茹藿兼粒食嘉運相
與諸吾願老可畢

起句
奇

卽事詩書餘影響操耕稼用心有淺深田力不相借耰
鋤貴適宜鹵莽與惰亞山果落風前蟋蟀鳴燈下辛勤
淹浹晨牽率到中夜

茅茨隱荆榛天寒爨烟直乃知隔嶺村先有幽人宅我
就與之言悅怡好顏色黍雞竈當門濁醪飲多力綿綿
締新交靄靄宛舊識牛羊日暮歸兒女亦留客天縱邱
壑情庭前視松柏

冷禽棲檐樹密雲定不飛興來成獨往中途還自歸北
風稜稜寒得此雪沾衣天地方寥闊生事安可違濁酒
足斟酌牛火理寒威感茲歲云暮百務良亦稀

深山寒欲雪天地空濛濛牛羊尚在野隔嶺喚牧童歸
來閉柴門婦子一室中聚乃知火力散即知隆冬官府
完租稅場圃畢農工談笑每終夕澹薄養微躬道路行
役子蕭條西北風

田園詩不擬陶則於題不稱專擬不能變化又失之
套故儲王以下皆能自出意思此十九首又與諸家
中別具機軸無一相似者神妙不測如此

清明

客道有長程紛紛祭掃人馬上無曆日知是清明民幾
樹野棠花初開溪水濱一簣蓬蒿土皆有麥飯陳春草
終結實甘苦情殊伸而我經十載曾未歸咸秦今日東
郊路童僕掃荆榛一葉長飄泊負我泉下親烏雛出深
樹高飛入青雲生死啣食去禽鳥亦報恩

登單父琴臺

人間有樂土兀然一琴臺花香流石氣松風灑青苔當
風挹其香東山空崔巍百里雖云小功成却不灰豈必
登台鼎而舒濟世才澤中足鴻鴈寰中足蒿萊習習留
餘韻鳴者安在哉

樅陽姚烈婦

雄雞雌鴛鴦單情安可雙鴛鴦會獨死乃在古樅陽昔
作女兒時性情本端方顏色復佳麗精妙世無雙秋水
如美日遠山如黛光柔荑如纖手芙蕖如粉香足趺如
春妍絲履五文章窈窕體傾國飄若驚鴻翔嫁爲蕩子
婦淒淒多悲傷蕩子嗜飲博生產盡消亡衣旣無完襦
厨亦無宿糧妾旣嫁君子妾心何敢望女蘿附松柏引
蔓千尺強女蘿附蒿蓬引蔓安能長貧富隨夫主饑寒
妾所當蕩子行不歸結髮四五霜三百六十夜夜夜留
空房妾身無爺娘蕩子無弟兄幸有三歲兒依倚延殘

生忍寒在妾身忍饑在妾衷哀此三歲兒饑寒聞啼聲
比隣有強暴自號王桂庭充役小船頭深沉府與城朝
進薪幾束暮進米斗升今日進半蔬明日進一羹物物
手自將事事皆周詳厚意妾所重厚意不敢承良人不
在茲女子問難通衣雖無完襦厨雖無宿糧縫紉勤力
作針線素所習十指易脫粟聊可度朝夕妾謹謝德惠
請勿復爲煩船頭故正色足恭而逡巡笑謂烈婦語區
區固不肖性喜濟危困前年有少婦夫死不能殯施錢
三十萬吾意曾不吝去年有小兒流落甚孤苦損貲百
餘金護送還鄉土况乃同里閭相托在比隣守望宜相

助有無宜相軫良人不在茲饑寒無怨望賢德夙所敬
周恤理所當况有三歲兒啼饑何忍聞慚愧諸微物瑣
細何足云薜荔可爲衣芰荷可爲裳薇蕨可爲食藜藿
可充腸嚴冬十臘月天地皆閉藏所託以爲命長鑱白
木柄野菜已無苗霜雪深復凍劇凍凍愈僵十指空成
瘡觀者咸歎息面面相視同聲謂烈婦逢此好隣舍
何乃太執意慷慨救急難近世無此事施恩不望報目
前大義士急須收受之受之勿再計船頭得聞之真成
大歡喜回頭語烈婦婦人雖女流亦須明道理一人不
足信衆言盡非是縫紉勤力作勞苦見淑儀針線素所

習巧妙隨天機窮鄉野里中此物當鬻誰賢德風所敬
稔知不惜死所悲三歲兒饑寒亦何罪人生大不孝莫
大絕宗祀吾不復多言衆言良可思烈婦謝再三船頭
饒再四隣里數十人皆言受之宜此意誠難得相勸勿
復辭烈婦仰頭答承衆尊長諭妾敢不聽從相恤理所
有取受當分明旣蒙邱山惠妾心實恐惶良人如能歸
圖報焉敢忘良人如不歸兒大役相償船頭得聞之心
中大歡喜朝進薪幾束暮進米斗升今日或半蔬明日
或一羹物物手自將事事皆周詳烈婦方感德船頭漸
相挑龍船窪中蘭射蛟臺邊草風吹蘭愈芳風吹草顛

倒烈婦草中蘭強暴風回旋屢屢自流盼渺渺如不見
歷歷語相侵漠漠如不聞昔意湯沃雪今成水潑石胸
中久懷忿欲洩未有隙公差三四人來下汎地夕船頭
置春酒中堂欵上客烹鱉膾鯉魚烹蝦淪蟹汁杯杓疾
如飛盆盎倒一吸夜半俱大醉不復畏紀綱船頭語公
差比隣有少婦精妙世無雙秋水如美目遠山如黛光
柔荑如纖手芙蕖如粉香足趺如春妍絲履五文章窈
窕體傾國飄若驚鴻翔吾嘗周饑寒大恩等玄黃大恩
久不報至今未有央便可喚之來侑我上客觴不知此
區區有當尊意否公差皆曰諾大笑齊拍手船頭便高

聲隔離呼姚婦吾家有貴客汝可來佐酒便可疾速來
速來莫遲久干呼不一應船頭遂大怒何物貧婦人輒
敢違吾語汝本死饑寒不死實賴予德重如邱山恩深
如父母受吾錢米多焉敢違吾語三喚不一來吾必強
拉取烈婦得聞之淚落如連珠出門還入房獨立自躊
蹰自幼作女兒從無偏邪行嫁爲蕩子婦守身如履冰
早不凍餒死遭逢此馮凌幾莖弱踈離安能隔暴橫妾
身如白璧安可點青蠅須臾決不斷數刻死恐晚急奔
足趑趄纔踰閨門限回顧三歲兒寂寂眠繩床別兒看
兒面淚落兒眼傍伸手欲拭拂又恐驚兒醒胸中呼兒

語母命在俄頃汝母生汝時日忍寒與饑雖忍寒與饑
頃刻無別離今夜一隔絕冥冥無會期汝父旣飄蕩死
生那得知母復舍兒夫兒寒誰當衣兒飢誰當食疾病
誰當治無復人護惜死生天有命徘徊復何益一身且
不保身後安可必死別方纒綿催呼吼如牛烈婦聞催
呼恐慄若戈矛時節甚促迫不得少停留兒須記一語
兒萬一長大托天報母仇翻身出門去去去村東頭是
夜月無光仰見雲間星妾爲蕩子婦蕩子爲浮萍浮萍
本楊花飄流自前生妾心星與月不污蕩子名非爲蕩
子名妾心死忠貞星月暫時暗星月有時明照妾冤與

恨冤恨何時平村東千萬樹高柯千萬餘能畢烈婦命
只用一小枝嗚呼康且直四體化蘭芝船頭飲方酣催
呼亦已久嗔婦不回語不聞婦喘息但聞兒呼母大家
出門看乃知己爲鬼里社咸聚觀云當報官府船頭對
衆言此婦素不賢嫁爲姚家婦亦已四五年三百六十
日日日怨蒼天種種諸過惡口口說不完果不任窮苦
今夕死飢寒渠自死飢寒安用報長官直須暴荒野如
此不賢婦便令飽烏鳶中有長厚者義編葦爲棺康熙
丁卯歲十月朔之日王家塘子後孤墳只三尺蕩子不
還鄉孤兒施家息冤沉名不彰蒼蒼何知識空留村東

樹夜雨風蕭瑟衆樹皆已朽此樹獨芬馥其枝直且長
其葉青且密中有一精衛其聲似黃鵠夜夜長悲鳴一
聽頭堪白精衛啣木石願得填東海黃鵠鳴訴天願得
發光彩同邑胡秋潭詳細向余傳昔曾訪隣里口禁莫
致論老圃王偏頭偶值菜畦邊四顧無行者曰婦正經
人又言費孝牧祖塋旺龍菴密邇節婦村隔溪二三里
臘月三十日祭掃過姚氏曾聞烈婦哭哀痛入骨髓朔
風忽慘烈朔雲忽陰森日光淡無色白晝如黃昏精誠
感天地不感强暴心丙申春三月聞之在濟南南山有
猛虎盡知能噬人中山有豺狼盡知能忘恩所最不易

知虎狼貌麒麟懷凶復姪毒往往易相親及其既覺時
雖悔何追尋丈夫且難之感激傷我神烈婦非不智網
羅竟罹身萬事不可錯九原不可作鷄子濺濺飛能殺
雲中雀鷄子飛翔翔雀死空唐喪時無廉明吏含冤永
泉壤

五古莫長于焦仲卿妻少陵北征變以唐體可
謂善學古矣此以題同故效之然亦有變處

謁閔子墓

朔雲擁塵飛黃葉散還聚步出齊東門來謁先賢墓草
枯寒墟平蕭條啟祠宇今昔感予心淚濕蘆花絮洋洋
汶水流蒼蒼華不注汶水一何遙華山一以暮人代有
升沉古碑久延佇冷日陷高原迴風繞官路昔賢辭權

門汶上猶堪去

灌菊

主人遠爲客時菊無甘雨如士天地間一飯至失所獨
任漢陰勞何待山陽侶籬外木桂花鎖細何足數物微
命不殊其滋根下土靈徹救趙宣淮陰哀漂母晚霞低
夕堦新月過蓬戶倬約桃李顏秋風不復覩落英屈子
餐南山柴桑伍奈何困阨時棄之等草莽汝花誠香潔
好開以報主前途降繁霜我行知何處

功成不望報有
魯仲連之風

文山吟

已卯春余將遊江南沂州任義六留余讀書文
山同事者弗從六月復還山東聞任子於山齋
署余一廬因作文山吟以簡
天下爲友朋者非譽任子也

文山高可攀江水深可覩金石有長操山水安能阻行
役大江南屢夢讀書處此生雖寂寥寧與異者伍吾亦
疑吾魂飛越不自主石上有流泉谷中有綠樹姓字留
精神清光照肝腑慚愧煩山靈擔荷以終古

弱水集卷二 五言古

蒲城屈 復悔翁著

曾孫 來泰志同錄

長洲馬 璞授疇

表姪同邑王廷瑗獻夫

武陵陳長鎮宗五

受業江西管之宋子弼

校

擬古 十一首

鬱鬱西山嵐青青西山草草與嵐一色松栢參其表風
塵錦繡衣光彩幾時好石室有琅函榮名艷蒼昊不出
春明門安能辨昏曉

求薪斯長松作曰塞深井違才理易乖况乃違情性豐
臺芍藥花安得籬菊靜緣木釣游魚逐風捉飛影

易知錄 卷二
置酒良燕會高歌棠棣篇歸來禁城南孤雲何翩翩網
魚下濁水弋鳥射暮烟捷徑而可爲日高濛汜淵

兩槳涉黃河採蓮河上山山上何所有松樹間竹竿竹
竿以作篙松樹以作船白日過人頭忽如風吹烟篙船
作已竟河水清於天顧此松與竹歲寒期空谷空谷石
皤皤獨唱採蓮曲

二月驅羸馬蹢躅彰儀門香車學水聲結駟流春雲屏
營大道側叱咤傷我神風雨自東來前路正黃昏翠鳥
知命侶野鹿知鳴群好我舊慧光庶不膺垢氛今日是

何日蝴蝶飛南園

崎嶇得相親一朝與一夕念君未見時惠我以可識馴
心而違素誰能別膠漆

三十不建節四十不著書五十已頭白
繭中蠶蠕須有絲空在腹何異蘆
卽且東山望西水若華徒踟躕一朝
藻彩質裁爲寒女衣寒女自巧妙珍
重登杼機

混混華山樵栖栖雲水游仙人教玉女
招我來瀛洲瀛洲波浪濶欲上木蘭舟
所飲聞瀛漿所衣聞霞裘雕欄百種花
奇香百種幽忠信乃靈藥長嘯空中樓

春條露霏霏吳蠶絲皎皎染絲難再白
吸露難爲飽飛來西山雲接我白雲表
絕俗以立名背世以自好春露

易乾素絲染易皂

雕蟲殊小技交友非一端性情成齒舌豪舉嗤平原庭
前桑榆樹白日在樹顛回首望蓬島滔滔東逝川燕市
狗徒策秦國繞朝鞭奇謀雖不用後世稱其賢

歸雲不還山高軒回東閣手中筇竹杖飄然下碧落胡
不厭風塵啖我以靈藥古來烟霞人多不棄藜藿棲遲
感此誼報之以冰雪

有事有情有景不是古詩套語
非同時人點破來者安得知

堂堂

以偶來松樹下
爲韻社題

堂堂復堂堂胡爲爭奇偶足無圯橋履衿見原憲肘一

言偶相合置之黃金閣一言或相迂黃金化爲土昨日

春風來今日桃李開有香當風揚須臾隨塵埃經綸若
敝屣文章豈賢才千金買楊柳萬金買蒿蓬秋色落碧
梧積雪埋青松人生當少年功名不早樹鬼神目如電
誰能洗肝腑敢以身賤貧卽悔詩書腐敢以勢位高報
怨猛如虎鮑叔誠痴愚酈季高天下我欲問古人我欲
問來者

欽奇
歷落

淨業湖修禊分韻得有字

參差宮殿高崔巍景山秀羣游採蘭香佳辰平湖右天
新無涯觀俯適坤輿厚盛事通古今獨爲逸少有輕波
懽容與風動甘泉柳來者知爲誰緬懷千載後

送程啟生旋里

木落西山青廬水碧於玉吟君贈我詩嚴霜放籬菊浮
雲淡河漢直鈎不如曲匹馬向江南江流一何速中有
魚龍影奮迅搖陰軸歛神忽自怡反真邁閒局遂與藻
麗辭靜見天地復彈琴對清月夜深淨如沐涼風吹早
寒兩處生空谷秋霜人所怨黃花正芬馥誰知挹露英
乃以資遐福

壬子冬以詩代書寄馬授疇

大道有冬春紆迴此相聚意氣不照顏奇懷信誰許文
園未薄遊孟公待腰組各無囊中帛華音應律呂至靜

腹羣動浮雲過天宇此來非靈修終滯桃花塢叢蓊豈
化蘭泥龍易賣雨清風吹一諾落葉飄何處江南芰荷
輕幽州冰雪古易衣亦高節驚飈動牖戶

聞曾少之下第作

西江阻且遠溝隍待君身鸞游卽蘭渚諒不救家貧逸
翮寧久羈圓景方在辰儲畜無擔石白髮有老親平生
桂林枝於我如浮雲光榮世所企局外安可論

貞女吟

女蘿雖小草不願附松栢平原贈千金仲連笑一擲妾
身非仲連妾心亦匪石修竹倚天寒織錦秉刀尺餐英

飲蘭露聊度風雨夕細微鴻鵠志願終此清白感君風
雲意千金非所惜荔支生東粵橘柚生南國荔支不知
西橘柚不知北物性固莫移謝君邱山力

文昌節婦吟宛轉此吟勁直所遇不同各有妙義亦
可見其自立門徑不依傍前人處戊戌怡賢親王未
封時令本旗尚書巢可托公薦博學端人脩資訪數
年不得至是以弱水應命先來達意許歲幣千金因
辭乃止此貞女吟之所由作也自詩
無小序後人暗中摸索徒勞聚訟

重過湖上

湘簾隔車塵路出平湖畔漱灑結晴光芙蓉昔燦爛春
風棟宇高讀書歲將半居尊固難罔在道何敢倦雨少
藕在泥雨多水沒岸此行亦須臾無情猶繾綣荷弱不

成梁終當離霜霰疾驅轅下駒深忤沙上雁

李刺史招飲

簡密香出花蔥蒨陰交樹開園近城隅我亦引坦步烏
啼隔牆聞苔色侵細路偶爾飲孤亭悠然墜春露嘯歌
天滿烟徘徊日欲暮月漸樓西明風已席邊度方歸動
離思重來展良晤

登雲居寺後最高峰望西北諸山

峻極難強名西北不知數高峰入空濛芳草滑朝露鳴
啣澗底花雲栖洞門樹日月不在天芙蓉出烟霧靈氣
若遊絲迴薄紛相妬方將領其要觸目忽已誤獨立意

難盡拱揖申遐慕

石經山亦名小西天

朝雲鬱未開遠翠當空漾山腰寺半邨麓足戶全障風
來衣袂飛身在西天傍七洞貯佛經皆言闕寶藏修覲
棲幽花羈情具別賞俯視向所歷泠泠鐘磬響

曉起望白帶山

削成玉芙蓉綠秀如大華迴望不及顛昨夕從此下濕
烟歛未畢白雲據爲舍遂令蒼翠色轉瞬恣變化泉香
猶在喉餘味甘於蔗矯然清若空萬事安可借靈景日
天開奇跡由人駕

遊白水興隆寺分賦

紆曲復紆曲亂石通騎足無若不空縣有林半喬木兩
峰夾澗高一水過橋束自我來帝京日日尋逸躅在家
既野鶴出門亦麋鹿涼風吹寒香白露生新綠秋晴帶
餘陰啼鳥媚幽獨悠然山水情自具烟霞骨

別魏進士襲侯

非不慕榮名簡略安素肯時代各有宜清風過俗耳大
隱在山林不聞在都市况茲傲與狂累人非一事方念
知音言復嘆驪歌起遠道帶長薄夕川明逝水幽燕綿
邈情感慨清華士悠悠黃太尉何由知孺子

庚子元日

九州幸無事遂此暫居閒
良辰有佳日鮮新我櫓端對
婦久何語把書南窻前
遲遲淡風色楞楞積雪寒
况乃抱微疴頗厭習俗率
廢書負暄坐去年客幽燕
所見整戎旅推轂寄親賢

起句蘊通首意

懷友詩

十一首有序

庚子春村居日永感與時會愛而不見者十有
二人賦詩十一章自浪遊二十七載海內交好
故鄉爲多已盡於此良非意所軒輊交有後先
因次之他年或有知我生平者疎密於中錙銖
在斯

件處士維天人

蒲城人

少小共螢窗老大成契濶薄遊輸蕭散守默尚東郭違
風水井塵聊以事冲漠雨餘土壤疏悠悠正田作憶我
萬卷書出門千金托至今曝秋陽籍錦藏芸閣瑣細猶
踐言能無重一諾

劉秀才伯容孝廉仲昭

蒲城人

龜勉窮道源

伯容少習程朱學

連攀拾秋月椿樹扶以踈萱草

芳復潔浹歲影離形少日枝麗葉燭銷雨中書坐積林
表雪心同跡不染事往情未歇

李翰林乾一

蒲城人

迢迢一紙書綿綿千里道上訊平安歸中悔錄詩少聿

來公望勞下云及春早豈知凜凜秋已遍青青草捧書
出懷袖臨風望燕趙高翥多鵝鸞長鳴盡駿馭寒溫非
虛名閒冷負懷抱

新安

新安吾平生知己庚辰以前詩皆所評定不著姓名但書其地九泉之下負此良友哀哉

買妾姑蘇臺市田洛陽縣自許靖郭君

謂余云家有護君者吾舉靖郭

君事折之

盟約誓當踐新安左司農久要有斯繆評我黑石

作可追魏與漢長葛古鬢宮銅駝舊禪院一行官日高
廿載書遂斷金骨易銷鑠貝錦何燦爛顧茲屋梁月猶
覲千里面佳集如獲璧微名不在卷贈答搜篋笥焚之
不忍看歸田賦良久黃梁醒已半薄遊偶傳聞屢訊余

萍泛去歲至燕家孝廉士範及先吏部老僕並言訊予踪跡甚殷畢世固多賢賞音難再見

胡秀才大中江南桐城人

老友胡秋潭交納半天下叶令子曰大中獨予託情素堅結如膠漆禮敬猶諸父昔我去京華就別臥疾處流光能幾時已綠庭前樹觀茲青葱色念彼霜霰故愛至然疑作獨繞孤根步

王司馬寄堂北直昌平人

天然好風度濟南王司馬識荆萍水初濫竽豪俊下編苦愧品藻錯繡賞梧櫟雖無百錢資尙有一言假左遷

賦閒居上客留空舍索逋雁成行高吟魚以雅月輝新
柳堤露濯芳草野

魏進士襲侯

富平人

少小多遠懷空虛昧經營妄慕天下士負笈關外行志
求山水音好別風雨星寡識耕魯甸垂老走燕京祿非
不試干名非貯興成嘯歌憇屠沽談笑揖公卿非才愧
文舉觸諱薦禍衡思發南雁過節感新鶯鳴幸免鼓吏
辱難爲知己情

陳贊府於立

富平人

同是秦川人相識幽燕市燕市多貴遊亦在湫隘騎每

閬北遊作頗疑嗜痂異逢人假羽毛竟夕傍看醉性於立
飲酒蘭實香所芳龍爲雲成氣未遂鴻鵠飛聊栖枳棘樹
新分何邑符春夢揮手處

趙侍郎曉亭

療饑粟勝珠禦寒布勝玉孟浪燕市遊蕭條旅舍宿侍
郎珠玉姿晤言更秉燭無義不拈花有會皆絕俗至今
流霞氣如充卧雪腹空谷春易深芳草心抽綠徒乏性
情歡寃隣溝壑辱

巢尚書寄齋

十年臥房山窮愁成令德救魏虞卿賢賞孫武子識持

予一卷詩遍示金門客醴酒非我榮千金非我惜楊花
已載塗費盡春風力

舒孝廉芝園

苔痕舒幽徑無私表春陽袂衣交敝裘欲脫復徬徨此
物故人贈音書關塞長蠟展西山遊煮茗溪流香關捷
躋花界枉路泛雲岡一別絕塵侶坐使變星霜烟景雖
云暖冰雪誰能忘

後懷友詩有序

嗚呼懷死者也古昔賢達不爲存亡異心非特
赴義求道貧且賤若此九原可作視斯世相法
幾里西州之痛今
天下無第二人矣

王贊府履思

諱其慎江
南上元人

才大遴青錢官卑惟黃綬既當少壯年況是名家後

望如

先生

雨來滋川原風甜散花柳此身但異姓齊心惟兩

首買山資已無倍價婢還有運合病且孤遂令君不壽

咏古十首

夷齊

仁義無羽翼夷齊非聖賢薄海盡歸周叩馬獨逆天能
及首陽餓花開陸地蓮命由白雲畢志與西山懸同時
得尚父曾居仲尼先薇蕨豈殊味芝桂難比肩

魯仲連

六國自帝秦何與布衣事六國且帝秦何況餒人子六
國果帝秦果否東海死一抗虎狼威軍退三十里東海
波瀾天巨鰲鼓利齒鄙夫志難奪每橫局外指

郭有道

絕俗始爲貞違親衆方軫將免朱門觀逃世以自引漢
末處士風有道意深穩遇李登仙舟慰左弭懷忿市朝
跡未空名利心已盡任化乃神龍離羣必蚯蚓角巾京
師遊高蹈德何損

留侯

相韓自先哲寸祿身未保椎秦博浪沙輔漢長安道遂

鹿無高皇孺子空衰老時微名不彰功成志方表

武侯

三聘來莘野三顧起南陽人代已云遠倚蘭發殊香管
樂昔未許日星今始光天縱王佐質時隔宣尼堂功業
有烜赫出處何荒唐

謝慶緒

貴盛易得名靜默難爲齒十年大平山終歲若耶水苟
非少微星安知真處士人意所珠玉天心或敝屣

狄梁公姨

皎然夜月光遜彼白日明浮雲滿僞闕仰觀列衆星丈

夫何茫昧嫠婦矢孤貞有子獨褐衣有甥方宰衡大哉
唐與周出處審高名中原存往跡蟾蜍蝕太清女主且
不仕遺後見深情

邵康節

徵聘跡不存式廬風蕭索小車載陽春隨處卽安樂道
鑄天民範書傳經世作溯源清洙泗分流瀉濂洛桂玉
策賢良夔龍老邱壑

鄭所南

精氣燭碧空石函沉古井蕭條金仙域最屬銀牀縷心
史出塵氛炎宇忽清冷哭比臯羽秘恨與文山永元代

既漠漠明時宜炯炯無天不闡幽賁志難長冥

申屠蟠

釣黨構已成氣節矜相奉勢傾慘朝野木摧盡梁棟申屠屬高雲羅外翔鸞鳳保已得天和逸世違時衆垢氛雖未膺芝焚能無痛

送姪孫之汝州

名璉敬止季子珮玉弟也

契濶三十載安知來海濱方將展情素秋風促行塵馬嘶紅葉路人立衰草原負責豈云畢

余負金已償

所愧病且

貧他鄉俱白首同歲尚孤身

孫與余同庚亦無子

寒山浦公壘夜

雨郊城村壯心雖未已含意何時申念汝父與兄在昔

交有神感激不可作空傷南浦魂

傷逝三首

榴花紅於血簷端經雨落入室室已空綺窗掩蕭索薰
風轉淒淒絳霄碧雲薄夙昔初不忘纏綿語如昨家山
千里遙他鄉一身約窮陰易爲感孤生何所托月出曉
未央星流動修櫓桃李凋春華桑榆仍漂泊

沉憂無終極朝日照屋梁左右皆儀容炎景何蒼茫今
去理殊路昔在花滿堂生衣斂朱桁錦衾猶覆牀翰墨
盡燒焚膏澤留餘香歸鳥飛向夕伏枕感蒙莊鵲鳩勿
更鳴春草已不芳

我有琴一弦古音自和平方彈未終曲絃斷不成聲此
弦已三斷同時眼中見冥冥白日光炎天落霜霰霜霰
入人心殘工積零素私懷願從遊重泉在何處何處是
重泉驚波成逝川逝者應群居存者當孤眠孤眠中夜
起月明鑒窻紙新故悲無時誓悟知妄理

馬授疇寄書及同人見贈詩冊招予入都商纂述
事卽用來韻書冊後

馬陵夕綿邈旱魃吹山平當軒據梧坐幽懷安得寧童
子向我言有書來燕京開書無一字心魂忽已清令德
托豪素肝膽照人明淒淒四月寒曖曖孤雲征洙泗響

未輟心跡庶能并廢言無餘貴立身賴友生念彼蛩蛩
意愧茲周周情剪燭置懷袖如流新雨聲

無一字言字字肝
膽非真無一字也

張家灣登舟

丙午九月
二十二日

一心暗漆燈雙目皎圓月並茲十指勞理絲成亂髮飄
飄孤飛雲西風有超忽移山衆所愚玉泉高突兀坐使
黃葉落霜寒遊俠窟下車辭塵囂登舟待明發

泊舟河西務

雲霧交溟溟未夕遂已暮聽彼舟子言方抵河西務栖
遲岸邊沙來往堤上樹犬吠驚飛蓬水聲向何處辜負

囊中錢沽酒無清畫

阻風天津關

二十
五日

所慮過關難過關亦何易囊中無長物得錢不留滯

舟

歛客錢賂關吏遂放行

天地忽異色波濤渺無際誰知石尤風虐

於關門吏水無江海深聲有雷霆勢萬舟一不發安可

獨兒戲

早發天津至獨柳

二十
七日

恭遇打頭風遭時宜坐守晷短途方長囊空客白首違
心叱舟子鼃鼃牽船走欸乃凌波濤並驅至獨柳野市
賤魚菜荒村貴米酒烟火數家連醉飽一夕厚解纜月

初墮停泊日未西雖無百里遙七十過已久倘令拘常情尚滯天津口

唐官屯

二十
八日

籬落萬餘家烟火靜黃昏野老四五人共作漁樵言停船一相見意恭禮不繁人代屢廢興唐官尚有屯籬篠供暮汲觴客進茗樽始嘆天地間無處無桃源

夜泊新集

破廟神橫斜敗垣屋傾圯鶉衣暮灌園鳩面晴覆笠自
古有窮鄉胡然曰新集並纜結兩舟當河排短檝童僕
更不眠秉燭防盜賊雲暗木門城鬼嘯磚河驛慚愧綠

林豪辱顧空囊客風水一激薄呼訊交相迫我方伸足
眠杳杳東方白

舟過滄州不得上岸訪友人

十月初一日

仙都在塵世每恨隔鄉縣千里訪逸人况值征途便高
城方到目輕帆疾於箭孤村連海陰歸雲納條巘室邇
結遐思順風垂素願滄溟三神山引去中流半回首清
風樓長揖向河岸

薛家塢

風止月復昏高卧聞搖櫓斷雁叫當空宿鷺起前浦雲
霧何冥冥略辨薛家塢空囊行路難村犬吠荒野回首

十年前滄江聽疎雨

薄頭鎮阻風

初二日

薄頭一鄉鎮富庶敵州縣日中百貨陳人家紛難辨我
行邁逆風遂繫河漕纜回颺歲暮多開窗煩屢看此地
有楊君昔遊郟城宦君諱清政知郟城豪強歛跡康熙四十二年爲人誣告被責革職
時至舉神君運去離罪譴繼者復爲誰貪庸衆鄙賤荆
康倚氏人乃擢吏部郎富貴愚氓羨天道無是非人事
政以賄成乃擢吏部郎富貴愚氓羨天道無是非人事
多變幻區區一夕閒靜坐何足嘆

連兒窩雨泊

初三日

寧走十丈塵不涉一尺水寧遭十日風不逢一夜雨泊

舟連兒窩秉燭屢移處敝帷障窗稜塞罅揉殘楮一人
阨陰霖千里無晴宇一夕不得眠三年有怨語

至德州

水聲寒向夕霜氣嚴侵曉積陰雖云多所幸淫雨少德
州七日程旬餘始能到美釀重羅酒佳果豐梨棗貨車
將遵陸溯溪復理櫂孤雲本無心萬事難預料早至固
欣然遲至亦自好

夾馬營

孤村臨河岸云是夾馬營結茅數十家寥寥雞犬聲我
欲審形勢水迅舟不停香風開大宋至今仰神明幅員

何必廣方足稱太平區區此下里誰者錫嘉名
鰣鰒鮓鱖黑雲近眉睫文運重休徵山河中天
地遙望洛陽城

臨清捨舟陸行

久厭舟居逸心儀陸行好凌晨戒吾裝驅馬就長道
霜空釀高寒十指殭欲槁昔疑運甓非今悲髀肉
早月盈玉兒肥釣直鯉魚少壯志風飛揚冷面塵
繚繞有愧玉關人宜歸渭濱老

宿荒村

寒日下廢墟晚烟歸樵牧荒途無旅舍田家憩茅屋
星

光照牛宮掃除飯脫粟驥伏戶外櫪童秉窓前燭時見
箕山雲亦就茅簷宿

至待召村去順德六十里復還臨清

已向東南行還登西北路待召有遺鄉在道豈吾素順
德半日程驅馬復歸去

復登舟

遵陸復理棹依然泛萍梗獨立帆前身照見水中影投
筆候萬里負郭田二頃以君鬚鬢霜令我熱腸冷勞勞
爭渡喧飄飄雲去嶺汶水西北流客路東南永

分水龍王廟

東來導汶流南北分相向黃河接混濛天津激溟漲有
明宋尚書奇功獨開創劈風神何靈兩帆各奔放世換
續流暉傷心極俛仰落葉飄浮雲蘋蘆不可罔燕都百
萬家至今籍漕餉雁臣知春秋漕船春至秋歸魚貫壓波浪不
敵江洪深殊安海濤壯我楫忽自停懷賢理難枉初日
懸高秋獨來拜遺像異流本同源人工偃天肌行舟薦
酒漿龍祠西岸上

貪人之功以爲己有恐龍神不敢享也然寄慨深矣

晚泊臨清

昔遊夢初覺倏已三十霜白首清源泊城郭晚暮蒼此
地幾故人飛沉切中腸古賢崇令德生死貴不忘新月

在船頭光輝在船倉誰能如月輪圓缺永相望

南陽

來往南陽鎮悠悠懷古情野聚冒靈跡我心愛嘉名物
物清且寒天氣殊春榮日上帆檣高雪水不成冰少往
亦佳耳忽憶崔州平

夏鎮

兩城霜氣高微陽上喬木回首三十年歲月一何速俗
敦貨殖風人迂詩書蠲門巷流水寒帆檣密于竹沽酒
自斟酌當年此信宿

台兒庄

一夕尙有情往還三五載市井尙依然門間有遷改日
暉沉薄冰炊烟淡光彩眼中新少年故人知誰在荒城
猶魯甸水流向東海風土夙所諳繫纜難重解

至鄴城喬居一夕而行

嗚呼客中客淒然歸未歸四載來燕山不識舊柴扉婦
樞在風雨僕瘦婢無衣萬端盡零落能不重歔歔嘗念
六合寒今看一室飢故人具雞黍相見終依依語少感
慨多六十何所希久住亦惘然明發攬鞢鞢

宿遷

斷冰磊黃流飛雪挾急雨驚風吹枯柳孤舟膠凍浦欲

登戲馬臺寒烟渺何處勇不敵萬人所誤豈稽古城高
鳥飛絕雲低壓柔櫓有騅而違時何怪天亡羽

守凍

暮年爭日月夜行豈違安舟居忽無水河平亂有仙大
哉天地力不能回嚴寒節序當如此風雪非所歎歎汝
亦何德隆冬輕波瀾

題是行役詩
不皆題中也

除夕

紛紛滿空雪皤皤一老叟茲年又棄予茲夕聊相守展
書對青燈僧厨暖春酒平生亦何爲俯仰五十九維揚
天地寒北風牛馬走剡溪興堪乘回曲功難偶日月儲

已多問君今何有

六十生辰

詩書今二曜唐虞昔鳴鳳人生一毛輕聞道邱山重岫
遠雲思還鵬息風難送僧厨對清齋維揚稀過從短短
髮如絲脉脉春陽動香到梅花無灰冷羨牆夢石轉志
莫移電流空自訟永懷劬勞恩此日能無痛

元夕

花燈古揚州幼聞甲冑區悠悠何歲年落落如鄉墟商
賈心多詐兒童語多虛繫我投林羽經冬此閒居黧黹
積夜陰安見湧蟾蜍冷灰寧復然白首猶故吾天地有

滄桑人事有駢除太平有氣象兆民自歡娛老病酒力
薄禪窓讀我書

時禁
花燈

渡江

浩蕩金山流蒼茫擊楫路估帆載春來江豚拜潮去遙
情一往深扁舟幾回渡風吹瓜步雲雨歇廣陵樹

試天闕茶

秦皇營八極干戈各自媚往往劉阮途沉醉以忘世天
闕檣旗開安知有高士素瓷一入手清風滌胸次幽意
撰佳辰適茲太初味結成無心雲江流渺天際嘗慕巢
與由悠然箕穎意

酒不如茶此論未
確然別有會心處

弱水集

卷二 五言古

二

聞友人近信

本來珠樹花新開鳳池右
天宮易長春香風居應久
我行亦云遙咫尺清塵後
悠悠汎愛前羽毛終在口
眷昔素浮深撫今跡鹵莽
莫展孤山梅徒折白門柳
用賞見餘清馳暉促回首
鴻鵠薄雲還麋鹿索群走
寂寂蕪城遊賦成案空朽
江南美人鄉燕雲復何有

登蜀嶺望金陵有懷

微雨俱好風楚天霽朝氣
烟火百萬家蜀嶺開紛翳
江春練不飛山青洛陽似
嵐奔波浪東遂擁前朝逝
伊人昔招携昏曙西山際
初景灼紫清建章分夕麗
懷遲感

四時霜露沾衣袂言詠賦新詩悠然乾坤細孤遊倦爲
旅六一芳草地折麻無予和北飛一雁唳

戊申除夕

適茲四方客陳醴相歡娛三年兩今夕禪房一榻俱婁
然夜遂深水霜涼不居稜稜歲增寒輝輝星漸除燕雀
巢邱城龍飛騰天衢俯仰亦云廣跼蹐蝸牛廬名山遍
未登邗水將焉如幾番南國風空花信易虛感此有來
疾春心滿江湖

弱水集卷一終